

МОНГОЛ УЛС, БҮГД НАЙРАМДАХ СОЛОНГОС УЛСЫН ЕРӨНХИЙ САЙД НАРЫН ХЭЛЭЛЦЭЭНИЙ ТУХАЙ ХЭВЛЭЛИЙН ХАМТАРСАН МЭДЭЭ

Монгол Улсын Ерөнхий сайд С.Баяр БНСУ-ын Ерөнхий сайд Хан Сын Сүгийн урилгаар БНСУ-д албан ёсны айлчлал хийв. Ерөнхий сайд нар аравдугаар сарын 15-нд хэлэлцээ хийж, Монгол, Солонгосын харилцааг цаашид эрчимжүүлэх арга зам, Зүүн Хойд Азийн бүс нутгийн өнөөгийн байдал болон олон улсын тавцан дахь хамтын ажиллагаа зэрэг харилцан сонирхсон асуудлуудаар өргөн хүрээнд санал солилцов.

1. Ерөнхий сайд нар Монгол Улс, БНСУ-ын хооронд 1990 онд дипломат харилцаа тогтоосноос хойш хоёр орны хамтын ажиллагаа улс төр, эдийн засаг, нийгэм, соёл, боловсрол зэрэг төрөл бүрийн салбарт эрчимтэй хөгжиж, эдүгээ 2006 онд тохирсон “Сайн хөршийн, найрамдал, хамтын ажиллагааны Түншлэл”-ийн зарчмын дагуу гүнзгийрэн хөгжиж байгаад сэтгэл хангалуун байгаагаа илэрхийлэв. Монгол Улсын шилжилтийн үеийн бэрхшээлүүдийг даван туулахад хоёр талын хамтын ажиллагаа үнэтэй хувь нэмэр оруулсныг Монголын тал талархан тэмдэглэж, Солонгосын тал энэхүү хамтын ажиллагааг бэхжүүлэхийн төлөө цаашид ч чармайн ажиллахаа нотлов.

2. Өнгөрсөн хугацаанд хоёр улсын хооронд хэрэгжсэн дээд, өндөр хэмжээний айлчлалууд нь харилцан ойлголцол, итгэлцлийг бэхжүүлэхэд үнэтэй хувь нэмэр оруулсныг тэмдэглэж, цаашдын хамтын ажиллагааны салбар, тэргүүлэх чиглэл бүрийн нарийвчилсан төлөвлөгөөг тусгасан “Монгол Улс, БНСУ-ын хамтын ажиллагааны дунд хугацааны үндсэн хөтөлбөр”-ийг байгуулж ажиллахаар тохиров.

3. Талууд хоёр улсын эдийн засгийн хамтын ажиллагааг харилцан ашигтай, бие биеэ нөхсөн хэлбэрээр хөгжүүлэх өргөн боломж байгааг санал нэгтэй тэмдэглэж, Монгол Улсын уул уурхайн салбарыг хөгжүүлэхэд хоёр Засгийн газар, хувийн хэвшлийн хамтын ажиллагааг өргөжүүлэхээр тохиров. Монголын ашигт малтмалын томоохон нөөц бүхий ордуудыг ашиглах хөтөлбөрт Солонгосын компаниудыг оролцуулах асуудлыг идэвхтэй судалж үзэхээ Монголын тал илэрхийлэв.

4. Талууд “Үйлдвэр, худалдааны хамтарсан Хороо”-ны анхдугаар хуралдааныг энэ онд багтаан зохион байгуулахаар тохирч, “Эрдэс баялаг, эрчим хүчний Хороо” зэрэг хоёр орны Засгийн газар хоорондын хороодын үйл ажиллагааг идэвхжүүлэхээр болов.

5. Монголын тал Солонгосын компаниудын Монгол Улсад оруулж буй хөрөнгө оруулалтын хэмжээ нэмэгдэж байгааг сайшааж, ялангуяа, Монгол Улсын дэд бүтцийг хөгжүүлэхтэй хопбогдсон олон улсын тендер, шинэ хот, суурингийн бүтээн байгуулалтад Солонгосын компаниудын

оролцоог дэмжихээ илэрхийлэв. Түүнчлэн Улаанбаатар хотын нийтийн тээврийн үйлчилгээг цогцоор нь боловсронгуй болгох талаарх Монголын талын саналыг Солонгосын тал нааштайгаар хүлээж авав.

6. “Монгол Улсын Мянганы хөгжлийн зорилгод суурилсан Үндэсний хөгжлийн цогц бодлого” боловсруулж баталсанд Солонгосын тал баяр хүргэж, цаашид энэхүү баримт бичигт тусгагдсан зорилтуудыг хэрэгжүүлэх төлөвлөгөөг боловсруулах чиглэлээр хамтран ажиллахаар болов.

7. Талууд БНСУ-ын Засгийн газраас Монгол Улсад үзүүлж буй Хөгжлийн албан ёсны тусламжийн үр ашгийг дээшлүүлэх талаар хамтын ажиллагааг бэхжүүлж, тусламжийн хөтөлбөрт Үндэсний хөгжлийн цогц бодлогын зорилтуудыг нэн түрүүнд тусгаж ажиллахаар болов.

8. Мөн хоёр орны хооронд чөлөөт худалдааны хэлэлцээр байгуулах асуудлаар хамтарсан судалгаа явуулахаар тохиров.

9. Хоёр талын зорчигч, ачаа тээврийн урсгалыг тууштай нэмэгдүүлэхэд нислэгийн тоо хэмжээ хангалтгүй байгааг тэмдэглээд агаарын тээврийн хэлэлцээрийг шинэчлэх, тогтмол нислэгийг нэмэх зэрэг асуудлуудыг судлахаар болов.

10. Талууд БНСУ-ын Олон улсын хамтын ажиллагааны агентлаг /КОЙКА/-ийн төслийн хүрээнд “Дорнод Монголын ХАА-н хөгжлийн мастер төлөвлөгөөг боловсруулах төсөл”-ийг хэрэгжүүлж эхэлсэнд сэтгэл ханамжтай байгаагаа илэрхийлж, цаашид Дорнод Монголын бүс нутгийг хөгжүүлэх талаар идэвхтэй хамтран ажиллахаа илэрхийлэв.

11. Талууд Монгол Улсын усны нөөцийг нэмэгдүүлэх тухай Засгийн газрын холбогдох байгууллагуудын хооронд хамтран ажиллах Санамж бичиг байгуулах ажлыг эхлүүлж, 2009 онд “Монгол Улс, БНСУ-ын Усны нөөцийн хамтын ажиллагааны хамтарсан хуралдаан”-ыг зохион байгуулахаар болов.

12. Хоёр тал Монголын шар шороон шуурга, цөлжилтөөс сэргийлэх чиглэлийн холбогдох байгууллагуудын хамтын ажиллагааг өндрөөр үнэлж, БНСУ-ын Засгийн газар түйрэн, цөлжилтөөс сэргийлэх төслийн хамрах бүс нутгийг өргөтгөх, түүнчлэн урьдчилан сэргийлэх зориулалтын автомашиныг Монгол Улсад нийлүүлэх асуудлыг нааштайгаар судалж үзэхээр болов. Мөн талуудын хамтын ажиллагааны хүрээнд 2007 оны аравдугаар сард байрлуулсан шар шороон шуурганы ажиглалтын төхөөрөмжийн үйл ажиллагаанд дүн шинжилгээ хийж, хоёр дахь төхөөрөмжийг суурилуулах боломжийг судалж үзэхээр болов.

13. Талууд Монгол Улс, БНСУ-ын хооронд дипломат харилцаа тогтоосны 20 жилийн ойг тохиолдуулан 2010 оныг Монгол дахь “Солонгосын жил”, 2011 оныг Солонгос дахь “Монголын жил” болгон

тус тус тэмдэглэхээр тохирч, “Монгол, Солонгосын Соёлын хамтарсан Хороо”-ны гуравдугаар хуралдааныг тохиромжтой хугацаанд зохион байгуулж, харилцааны ойг тэмдэглэн өнгөрүүлэх асуудлыг жич хэлэлцэхээр болов.

14. Монголын тал БНСУ-ын Засгийн газрын тэтгэлэгт хамрагдах монгол оюутны тоог нэмэгдүүлсэнд талархал илэрхийлж, Солонгосын тал өөрийн оронд суралцаж буй монгол оюутнуудад дэмжлэг туслалцаа идэвхтэй үзүүлж ажиллахаа илэрхийлэв.

15. Хоёр тал харилцан адил байх зарчимд тулгуурлан, талуудын энгийн паспорт эзэмшигч иргэдэд 90 хоногийн хугацаатай зорчих виз олгож байх зарчмын тохиролцоонд хүрч, холбогдох хэлэлцээр байгуулахаар болов. Улмаар хоёр орны иргэд зорчих нөхцөлийг үе шаттай хөнгөвчлөх замаар таван жилийн дараагаар харилцан визгүй зорчих асуудлыг хэлэлцэв.

16. Хоёр талын харилцаанд гол үүрэг бүхий эрдэмтэн судлаачид, оюутан зэрэг хүмүүсийг визийн хураамжаас чөлөөлөх, тэрчлэн БНСУ-д зорчих олон удаагийн визийн хугацааг гурваас дээш жилээр тогтоох тухай Монголын талын саналыг харилцан адил байх зарчмын үүднээс Солонгосын тал нааштай судалж үзэхээр болов.

17. Монголын тал 90 хоног хүртэлх хугацаагаар өөрийн улсад оршин сууж буй солонгос иргэдийг гадаадын иргэдийн бүртгэл болон гарах виз, түүнчлэн түр буцах үнэмлэхээр Монгол Улсын хилээр гарч байгаа солонгос иргэдийг гарах визээс чөлөөлөхөөр болов.

18. Хоёр тал Солонгосын Инчхоны олон улсын нисэх онгоцны буудал, Чингис хаан олон улсын нисэх онгоцны буудлын хооронд болон Инчхоны олон улсын нисэх онгоцны буудал, БНСУ-д суугаа Монгол Улсын ЭСЯ-ны хооронд шууд харилцах утас (hot line) тус тус нээх замаар хил нэвтрүүлэхээс татгалзсан хоёр талын иргэдийн тухай мэдээлэл солилцох тогтолцоог бүрдүүлж ажиллах болов. Энэхүү тогтолцоог бүрдүүлэх, иргэд харилцан саадгүй зорчих нөхцөлийг хангахад тус дөхөм үзүүлэх зорилгоор хоёр талын олон улсын нисэх онгоцны буудлын Хилийн шалган нэвтрүүлэх албадын хамтын ажиллагааны Санамж бичиг байгуулахаар болов.

19. Талууд Монгол Улс, БНСУ аль аль нь Зүүн Хойд Азийн бүс нутагт оршдогийн хувьд тус бүс нутгийн энх тайван, аюулгүй байдал, хөгжил цэцэглэлийн төлөө цаашид нягт хамтран ажиллахаа илэрхийлэв. Монголын тал Өмнөд, Умард Солонгосын харилцааг хоёр талын хөгжил цэцэглэл, улмаар Солонгосын Хойгийн энх тайван, тогтвортой байдал, эдийн засгийн хамтын ажиллагаанд нийцүүлэн хөгжүүлэхэд чиглэсэн БНСУ-ын Засгийн газрын хүчин чармайлыг дэмжиж, Умард Солонгосын цөмийн зэвсгийн асуудал зургаан талт

хэлэлцээний хүрээнд энх тайван, дипломатын аргаар ойрын үед шийдвэрлэгдэнэ хэмээн найдаж буйгаа илэрхийлэв. Солонгосын тал бүс нутгийн олон талт хамтын ажиллагааны үйл явцад оролцохыг эрмэлзэж буй Монгол Улсын Засгийн газрын байр суурийг ойлгож байгаагаа илэрхийлэв.

20. Талууд НҮБ болон олон улсын бусад байгууллагын хүрээнд хамтын ажиллагаагаа цаашид улам бэхжүүлэхээ нотолж, 2013-2014 онд НҮБ-ын Аюулгүйн Зөвлөлийн Байнгын бус гишүүний сонгуульд нэрээ дэвшүүлэх тухай БНСУ-ын Засгийн газрын шийдвэрийг Монголын тал сайшааж байгаагаа илэрхийлэв.

21. Хоёр тал “Иргэний болон худалдааны хэргийн талаар эрх зүйн туслалцаа харилцан үзүүлэх тухай Монгол Улс, БНСУ-ын хоорондын гэрээ”, “БНСУ-д ажиллах хүч оруулах тухай Монгол Улсын Нийгмийн хамгаалал, хөдөлмөрийн яам, БНСУ-ын Хөдөлмөрийн яам хоорондын Санамж бичиг”, “Эрчим хүчний салбарт хамтран ажиллах тухай Монгол Улсын Эрдэс баялаг, эрчим хүчний яам, БНСУ-ын Дулааны шугам сүлжээ корпораци хоорондын Санамж бичиг” тус тус байгуулав.